

四庫全書

史部

欽定四庫全書

明會典卷五十二

禮部十一

東宮監國

永樂七年定

一朝儀凡常朝於午門左視事其左右侍衛及在京各衙門官員人等合啓事務如常儀若皇太子御文華殿官員人等承旨召入者方許入凡在京文武衙門遇有

內外軍機及王府切要事務悉奏請處分其有各處啓報聲息即調邊官軍勦捕仍遣人馳赴行在所奏聞其皇城四門各城門守衛圍宿比常時皆須增撥官軍仍每日操閱軍馬如各衙門稱奉令旨調遣官軍及處分事務所司須覆啓施行 十二年奏定常朝於文華殿視事其在京文武衙門凡有應合奏啓事件奏本俱達杜京敢有隱匿者治以重罪其在京衙門合具啓事務仍依常例若係應奏隨即具奏待報其東宮發落事件

六科按月差人類進北京敢有於題本上增減改寫旨意者凌遲處死全家籍沒其各衙門差人出外幹辦公事仍將所辦事務開具奏報

一慶賀凡遇萬壽聖節正旦冬至先期皇太子率文武百官於文華殿前拜進表文是日早設龍亭於文華殿中丹陛上設大樂鳴鐘鼓皇太子具冕服于丹陛上百官具朝服于丹墀內行十二拜如常儀禮畢儀仗鼓樂導表由中門出皇太子由左門送至午門還宮文武百

官導至長安右門外文官五品以上武官四品以上及近侍官監察御史俱乘馬導至三山門外以表授進表官百官各回至期行告天祝壽禮是日早設香案於文華殿丹陛上設駕大樂鳴鐘鼓如常儀皇太子具冕服於丹陛上文武百官具朝服于丹墀內行八拜如常儀其在京文武衙門遇萬壽聖節禮部同文職衙門共進表一通中軍都督府公侯駙馬伯武職衙門共進表一通正旦冬至亦如之其正旦冬至千秋節文武百官於

文華殿行慶賀禮如常儀其有王府遣人詣東宮前行
禮即納其禮物宴賞差來人其應合答禮者奏聞處分
一祭祀凡遇享太廟祭社稷風雲雷雨山川之神預期
勅皇太子攝祭其祀典神祇太常寺預期於行在所奏
聞遣官行禮 十二年奏定凡祀典神祇合應遣官祭
者太常寺預期具啓遣官行禮

一宴賞凡四夷來朝循例宴之皇太子命禮部遣人送
行在所正使人給鈔十錠從人五錠為道里費其每日

賞賜有例者循例無例者臨時斟酌賞之其京衛軍士
冬夏布絹及邊衛軍士冬衣綿布循例給賞其有折賞
物色該部定擬具啓施行十三年奏定京衛軍士冬
衣布絹及邊衛軍士冬衣布花襖俱行在戶部奏請施
行

一選法凡文選六部都察院翰林院太醫院欽天監堂
上官尚寶司通政司太理寺太常寺光祿寺鴻臚寺國
子監堂上掌印官六科都給事中并在外布政司王府

長史有闕吏部奏請擢用其考滿黜陟并復職改用等項常選官員俱循例具啓銓注其武職選除在京五府都督在外各都司都指揮關員者及土官衙門奏保土人任職者兵部奏請擢用自餘龍替優給及例應陞降改調官員具啓銓注其土官例應龍替及保用通事把事隨司辦事長官該部具啓裁度餘悉奏請處分其内外大小文武官員俱從行在吏部兵部奏請銓選其有開設大小衙門該部奏請定奪

一刑名凡内外文武大小官員有犯所司具啓准問者
問之若皇親犯小事令其在家聽候具由奏請待報若
所犯情重及干謀逆者即時拘執在官先命皇親會問
若事有未當及犯人不服乃命公侯伯五軍六部都察
院大理寺會皇親再問畢將所服情犯及議擬罪名具
啓候車駕回京奏請處分其在外王府護衛指揮并長
史及土官有犯事干惡逆先行收問然後奏聞自餘所
犯預奏待報提問其法司問擬罪合決死罪者奏請待

報其餘所犯悉具啓決放如特奉令旨原免者不拘此
例 十二年奏定皇親并軍職王府護衛指揮長史等
官與各處土官有犯者俱奏請提問其在京文武衙門
官員有犯者堂上官具奏待報發落其五品以下者具
啓拿問其在外文職衙門官員有犯者方面及四品以
上官員該衙門奏請提問其五品以下具啓拿問

一迎詔凡詔書至禮部設龍亭錦衣衛設儀仗教坊司
設大樂文武百官各具朝服出三山門外奉迎使者到

三山門外下馬候龍亭來捧置詔書于龍亭中使者立于龍亭之東百官行五拜叩頭禮訖衆官乘馬導使者上馬在龍亭後東邊行至長安右門下馬隨龍亭後東由中門入文武百官於承天門外橋南侍立東宮殿下具冕服於午門下五丈餘地奉迎至文華殿置龍亭于正中使者立於東東宮殿下於殿前臺上樂作行五拜三叩頭禮畢樂止陞殿殿下展詔讀訖使者捧詔置龍亭中殿下送至午門內錦衣衛先設雲輿于午門外正中

禮部官置詔書于雲輿內文武二品以上官迎至承天
門鴻臚寺先設開讀案於承天門稍東文武百官入班
贊禮唱排班班齊鞠躬樂作四拜平身樂止贊開讀使
者取詔授開讀官跪受使者復立位所贊跪衆官皆跪
開讀訖開讀官捧詔授使者復置雲輿中贊俯伏樂作
四拜平身樂止贊揖笏鞠躬三舞蹈贊跪唱山呼萬歲
者三贊出笏俯伏樂作四拜興平身樂止贊禮畢百官
以次退使者捧詔書出承天門外復置龍亭中鼓樂送

至會同館使者見東宮殿下四拜禮畢其日宴使臣於禮部本部待宴

一進春十三年奏定其日早文武百官各穿顏色衣服文華殿門外侍班如常儀應天府置春案於文華門丹墀中道之東候東宮殿下陞座引禮引府縣官舉春案由東陛陞置于殿門外中道各就拜位鞠躬四拜平身禮畢文武百官慶賀行叩頭禮

皇太孫監國

永樂八年定

一每日皇長孫於奉天門左視事侍衛如常儀諸司有
事具啓施行若軍機及王府要務一啓皇太子處分一
奏聞行在所

一遇萬壽聖節設香案於奉天殿丹陛上皇長孫具色
服於丹陛上行禮文武官具朝服於北京行部行禮如
常儀天下諸司表文俱詣北京進賀四夷朝貢俱送南
京禮部啓皇太子施行

一文選行在六部都察院等衙門及北京行部所屬衙門如有闕員應除補者五品以上行在吏部移咨南京吏部啓皇太子選補六品以下及考滿起服例應陞降復職及對品改用常選官撥用吏典俱循例啓皇長孫施行

一武選行在五軍都督府及行後軍都督府所屬衙門例應牒替優給陞降者行在兵部亦循例啓皇長孫施行自餘非常選者啓皇太子斟酌行之

一內外官吏軍民有犯所司啓皇長孫施行若皇親有
犯小事令其在家聽候所司啓皇太子待報施行若所
犯情重及干謀逆者即時拘執先命皇親會問若事未
當及犯人不服乃命公侯伯五軍六部都察院大理寺
會皇親再問將所服情犯啓皇太子候車駕回京奏請
處分其王府護衛指揮及長史有犯干惡逆者先行收
問然後啓皇太子自餘有犯啓皇太子待報收問其行
在刑部都察院北京行部議擬囚人應死者監候啓皇

太子待報施行餘悉啓皇長孫裁決



明會典卷五十二

欽定四庫全書

史部

明會典卷五十三至

詳校官編修臣裴謙

編修臣程嘉謨覆勘

總校官知縣

臣

繆

琪

校對官中書

臣

高

中

謄錄監生

臣

李廷對

欽定四庫全書

明會典卷五十三

禮部十二

王國禮一

封爵

明祖訓

親王授以金冊金寶妃正授金冊不用寶親王嫡長子年及十歲朝廷授以金冊金寶立為王世子如或以庶奪嫡輕則

降為庶人重則流竄遠方如王年三十正妃未有嫡子其庶子止為郡王待王與正妃年五十無嫡始立庶長子為王世子親王次嫡子及庶子年至十歲皆封郡王授以鍍金銀冊銀印子孫未封者稱王子王孫言語皆稱裔旨親王女曰郡主自郡主以下俱授誥命郡王女曰縣主郡王孫女曰郡君郡王曾孫女曰縣君郡王玄孫女曰鄉君靖江王府合比王支郡王遞減一等稱呼女封縣君

凡王世子承襲王封朝廷遣人行冊命之禮授以金冊

傳用金寶

凡王世子并郡王娶妃及郡王受封并郡王嫡長襲封者當先上聞朝廷遣人止行冊命之禮

凡郡王子孫授以官職子授鎮國將軍

三品

孫授輔國將

軍

四品

曾孫授奉國將軍

五品

玄孫授鎮國中尉

六品

五世孫

授輔國中尉

七品

六世孫以下授奉國中尉

八品

事例

洪武二十五年奏定王妃以下有所出者稱夫人 永

樂間詔加鎮國將軍從一品輔國將軍從二品奉國將軍從三品鎮國中尉從四品輔國中尉從五品奉國中尉從六品 正統間令親王有長孫者授以世孫給一品冠服郡王有長孫者授以長孫給二品冠服 天順間定凡各王府所生子女年至十五方許請封 弘治四年定親王世子授封其母始封夫人 十年定宗室舊制郡王出府止封一妃鎮國將軍輔國將軍各止封一夫人奉國將軍止封一淑人鎮國中尉止封一恭人

輔國中尉止封一宜人奉國中尉止封一安人妾媵不
封十一定親王郡王子女封爵遵照祖訓及天順末詔
書例親王嫡庶子女郡王嫡長子孫俱年至十歲請封
其餘子孫應封鎮國輔國奉國將軍鎮國輔國奉國中
尉者及各郡王各將軍中尉女俱照天順中例年十五
方許請封

製名

明祖訓見宗人府

之國

事例

國初親王之國百官送至龍江關後凡之國日上御奉天門早朝畢文武百官稍退侍立上降寶座後坐玉冕服由左順門內引二人朝服前導由東第二橋上奉天門至御前行五拜禮上賜王酒飲訖叩頭畢上起送王至東階上王叩頭下上目送出午門王復叩頭闔門上還宮百官不送惟先一日早赴王府行辭禮

洪武間定凡王還國祭祀禮用豕一羊一葷素各一壇
祭于端門不用制帛後罷端門祭用葷素二壇祭于承
天門外

凡王之國所過州縣文武官迎接便服行四拜禮
凡王之國沿途合祀神祇近者大小皆親祭遠者望祭
仍先遣奉祀官灑掃社稷山川壇及旗纛廟預備祭物
王將到國前三日致齋至城外本處文武官率耆老出
城迎接不行禮導王詣社稷山川壇祭祀各官及耆老

隨班陪祭禮畢送王至宮陞殿行賀禮

凡王在途遇詔赦迎接行禮畢先退不聽開讀

凡王在途遇進賀表箋一體具服行禮天順五年奏准

凡王之國果從舊王府城外經過許出相見隨即回府

若不從城外經過者不許

慶賀

明祖訓

凡遇天子壽日王於殿前臺上設香案具冕服率文武

官具朝服行祝天地禮若遇正旦拜天地後即詣祖廟行禮畢陞正殿出使官便服行四拜禮文武官具服行八拜禮

事例

洪武十八年定凡王到國慶賀禮儀其日設儀仗於露臺上下之東西設大樂於露臺上東西北向陳金鼓旗於承運門外軍職官員各守殿及王城門設文武百官拜位於丹墀文東武西設贊禮官二員於文武百官拜

位之北東西相向護從執事等官先詣圓殿後候典服官啓請王具冕服訖典儀啓執事者先行四拜禮畢各就位典儀啓請王陞殿導引官前導大樂作陞座訖樂止贊排班引禮引文武官就拜位贊班齊鞠躬樂作四拜平身樂止引禮引班首陞自東階由殿東門入至殿中贊跪外贊同贊跪班首衆官皆跪班首致詞云某官某等敬惟殿下欽承上命至國之初理當慶賀如係王府官則稱臣某等後同內外贊俯伏興引禮引班首復

位贊鞠躬樂作四拜平身典儀詣殿中跪啓禮畢樂作
導引王還宮樂止各官以次出凡慶賀禮儀俱同惟改
致詞

凡遇聖節及正旦冬至節日行告祝天地禮其日設香
案於露臺上設王拜位于案前文武官拜位于丹墀之
東西王冕服就位各官具朝服隨班四拜王詣香案前
跪衆官皆跪王致祝詞訖隨意致詞俯伏興復位衆官皆俯
伏興又四拜禮畢

凡中宮壽日王冕服妃具禮服設香案於內宮門露臺
上行告祝天地禮先四拜興王詣香案前跪告祝訖俯
伏興復位又四拜禮畢不用樂百官不隨班

凡東宮壽日行告祝禮王皮弁服百官具朝服隨班行
禮具儀同前

凡慶賀正旦禮王冕服文武百官朝服四拜班首由東
陞陞殿致詞云某官某等茲遇三陽開泰萬物咸新敬
惟殿下茂膺多福賀畢俯伏興復位又四拜禮畢

凡冬至王壽日禮同惟改致詞冬至云某官某等茲遇
節應黃鍾日當長至敬惟殿下茂膺多福壽日云某官
某等茲遇殿下壽誕之辰某等敬祝千歲壽

凡慶賀正旦冬至王壽日惟王府官屬及附郭衙門丈
武官員稱賀在外各衛所府州縣衙門預期摘撥佐貳
官或首領官一員至日隨班行禮本府典儀具啓本云
某處差某等官幾員為正旦前來慶賀啓聞訖然後行
禮其有出使官員一體隨班

凡王妃到國五品以上命婦出城五里迎接送到宮行八拜賀禮

凡遇冬至元旦五品以上命婦具服詣宮行賀禮贊四

拜班首由東陞陞殿跪外命婦皆跪班首致詞云某封

某氏等茲遇正旦云履端
冬至云履長之節敬詣王妃殿下稱賀如

王府官命婦為班首則稱妾某封某氏等後同興復位

四拜禮畢其王妃壽誕禮同惟詣王妃前致詞云某封

某氏等敬惟王妃殿下壽誕之辰祝千歲壽其命婦班

次照夫品級

明會典卷五十三

欽定四庫全書

明會典卷五十四

禮部十三

王國禮二

朝見

明祖訓

凡朝臣奉使至王府或因事經過見王並行四拜禮雖三公大將軍亦必四拜王坐受之若使臣道路本經王

國故意迂迴躲避不行朝王者斬

凡王府文武官並以清晨至王府門候見其王所居城內布政司都指揮司并衛府州縣雜職官皆於朔望日至王府門候見若有事召見者不在此限

事例

洪武十八年定

每日王府官屬常朝依文武左右班立遇朔望本處守禦衛分及府州縣等官朝見各照品級依文武東西列

班行叩頭禮畢四品以上及長史紀善陞殿五品以下
於丹墀東西序立北向若有事召見者不在朔望之限
又王府凡有辭見官員人等每日早晚俱引見

成化三年續定

凡京官公差出使在外道經王府報名見辭如遇朔望
三司等官至府候見公差出使亦詣府隨班行禮若進
表祭祀係應行禮儀出使公差官不必隨同行禮

表箋

明祖訓

凡正旦遣使進賀表箋王具冕服文武官具朝服滌寶用寶訖置表於龍亭王率文武官就位王於殿前臺上文武官於臺下行十二拜禮畢王送表出宮城門止離五丈地文官送出國門武官從王還宮

凡進賀表箋皇太子親王於天子前自稱曰長子某第幾子某王某稱天子曰父皇陛下稱皇后曰母后殿下若孫則自稱曰長孫某封某第幾孫某封某稱天子曰

祖父皇帝陛下稱皇后曰祖母皇后殿下若天子之弟
則自稱曰第幾弟某封某稱天子曰大兄皇帝陛下稱
皇后曰尊嫂皇后殿下若天子之姪則自稱曰第幾姪
某封某稱天子曰伯父皇帝陛下叔父皇帝陛下稱皇
后曰伯母皇后殿下叔母皇后殿下若封王者其分居
伯叔及伯叔祖之尊則自稱曰某封臣某稱天子曰皇
帝陛下稱皇后曰皇后殿下若從孫再從孫三從孫自
稱曰從孫某封某再從孫某封某三從孫某封某稱皇

帝曰伯祖皇帝陛下叔祖皇帝陛下皇后曰伯祖母皇后殿下叔祖母皇后殿下

事例

洪武十八年定

凡遇元旦冬至預期進賀表箋萬壽聖節預期進賀表文俱行十二拜禮其日清晨設龍亭於正殿中設儀仗大樂於露臺西設表箋案於龍亭前設香案於表箋案前進表箋使者立於香案東捧表箋官立於香案西設

香案亭於承運門中道設王拜位於露臺上百官拜位
於丹墀王冕服就位百官朝服隨班班齊贊鞠躬樂作
四拜平身樂止引禮啓請王詣香案前跪贊百官皆跪
執事者以表箋跪授王王受以授使者跪受置龍亭訖
俯伏樂作平身樂止復位贊鞠躬樂作四拜平身樂止
啓請王搢圭贊百官搢笏鞠躬三舞蹈跪山呼者三俯
伏樂作興又四拜樂止禮畢儀仗鼓樂前導百官朝服
送至郊外王送至宮城門就回護衛官從王還宮

凡遇特進中宮箋文王冕服百官朝服隨班俱行十二拜禮陳設如前儀班齊四拜啓請王詣香案前跪百官皆跪執事者以箋跪授王王受以授使者使者跪受置龍亭訖俯伏興復位再行八拜禮畢不必舞蹈山呼

凡遇特進東宮箋文陳設如前儀王具皮弁服百官具朝服隨班行四拜禮啓請王詣香案前跪百官皆跪執事者以箋跪授王王受以授使者使者跪受置龍亭訖俯伏興復位又四拜禮畢

受歷

事例

洪武十八年定

親王受歷每歲九月初一日欽天監進次年歷日頒訖即遣使者齎歷至王國長史司官先啓聞設香案於殿上王常服出殿門迎接使者捧歷詣殿上置於案退立於案東引禮引王詣前贊四拜贊跪使者取歷立授王王受訖以授執事者復置于案贊王俯伏興再四拜禮

畢

迎詔

明祖訓

凡遇詔赦至王國武官隨王侍衛不出郊外文官具朝服出郊奉迎安奉詔赦於龍亭乘馬前導王具冕服於王城門外五丈餘地奉迎至王宮置龍亭於正殿中王於殿前臺上先行五拜禮畢陞殿侍立於龍亭東側武官護衛文官於臺下自行十二拜禮跪聽開讀

洪武禮制

凡使者欽齋詔書至王府至王城門外一里遠下馬隨龍亭由中門靠東邊入龍亭至殿中使者立於殿外東序西向候行禮畢使者見王行四拜禮

事例

洪武十八年奏定

凡有特旨御筆至王所則遣官於郊外迎接設香案於殿中候使者至王宮門外王出迎使者以聖旨置殿上

香案導引啓王四拜興詣香案前使者以聖旨授王王跪看畢仍置於案俯伏興復位又四拜禮畢各官不必

陪班

祭祀

明祖訓

凡王國宮城外立宗廟社稷等壇宗廟

立於王宮門左與朝廷太廟位

置社稷立於王宮門右與朝廷大社位置同

風雲雷雨山川神壇

立於社稷壇西

旗纛廟

立於風雲雷雨山川壇西司旗者致祭

凡祭五祀

用豕一祝帛
香燭酒果

司戶之神

於宮門左

設香案正

司龜之神

於廚舍設香案

四月初四日門官致祭

案六月土旺戊日

司門之神

於承運門

稍東設香案

司雷之神

於宮前丹墀

內近東設香

案十月初一日門官致祭

承奉司官致祭

司井之神

於井邊設香案

十月月初一日

司門之神

於承運門

稍東設香案

一月初一日門官致祭

事例

洪武初令王祭宗廟用冕服文武百官祭服陪祭
祭器籩豆八簠簋各二牲用少牢其廟制許立五
廟二昭二穆與始祖之廟為五以始封之王為始

祖靖江王國則以南昌王為始祖四時之祭皆用
王者禮樂 十一年定王府社稷無配位社稱國
社之神稷稱國稷之神 十八年定祭社稷儀一
齋戒正祭前四日奉祀所具本啓聞於午後沐浴更
衣于齋宮次日為始齋三日凡齋戒不飲酒不茹葷
不弔喪問疾不聽樂不行刑不判署刑殺文書不預
穢惡事一省牲正祭前一日清晨設香案于宰牲房
外導引官四員導王常服詣省牲位啓省牲執事者

牽牲過香案前訖啓省牲畢遂宰牲以盤盛毛血伺祭
瘞之一陳設前期掃除壇場幕次至期掌祭官率執事
陳設籩豆簠簋酒樽等物一正祭其日昧爽王具皮弁
服文武官祭服典儀唱樂舞生就位執事官各司其事
導引官四員導王詣拜位內贊啓就位典儀唱瘞毛血
執事者以毛血瘞於坎內典儀唱迎神典樂舉麾唱迎
神樂奏廣清之曲候樂作內贊啓鞠躬四拜興平身樂
止典儀唱奠帛初獻禮典樂舉麾唱初獻樂奏壽清之

曲武生舞武功之舞執事者捧帛爵獻于神位前讀祝
官取祝跪于神位之左內贊啓典儀唱讀祝訖內贊啓
俯伏興平身樂作通贊同唱百官俯伏興平身樂止典
儀唱亞獻禮典樂舉麾唱亞獻樂奏豫清之曲文生舞
文德之舞執事官舉爵進獻如前儀訖樂作典儀唱終
獻禮典樂舉麾唱終獻樂奏熙清之曲文生舞文德之
舞執事官進爵如亞獻儀訖樂止典儀唱飲福受胙典
膳以福酒及胙自神位前由正門左捧出內贊啓跪指

圭典膳以福酒跪進內贊啓飲福酒訖典膳以胙跪進
內贊啓受胙啓出圭俯伏興平身內贊啓鞠躬四拜興
平身通贊同唱百官四拜典儀唱徹饌典樂舉麾唱徹
饌樂奏雍清之曲執事官各詣神位前徹饌訖樂作典
儀唱送神典樂舉麾唱送神樂奏安清之曲內贊啓四
拜通贊同唱四拜樂止典儀唱讀祝官捧祝掌祭官捧
帛各詣瘞位典樂舉麾唱望瘞樂奏時清之曲內贊啓
禮畢一祭山川儀與社稷但不瘞毛血詣瘞位改為燎

位及樂歌不同一祭旗纛遣武官戎服行禮儀與山川同但樂用大樂一五祀儀孟春祀戶孟夏祀竈季夏祀中雷孟秋祀門孟冬祀井俱於本月上旬擇日中雷則於土旺日遣官致祭用大樂行三獻禮不用飲福受胙宣德二年令王府祭宗廟用文公家禮

筵宴

事例

洪武十八年定

凡大宴七爵禮儀其日設王座于存心殿設酒亭于座
西南膳亭于東南設文武官四品以上座次于殿內東
西相向酒樽食桌于殿外五品以下座次于兩廊設細
樂于殿內大樂于殿外典儀啓請陞座殿下常服出樂
作陞座樂止引禮引文武四品以上官及長史詣殿內
五品以下詣殿外列班北向贊鞠躬樂作四拜樂止進
筵樂作有花則進花進訖樂止色長跪啓一奏喜千春
之樂次唱樂作進第一爵酒贊各官跪色長跪唱進酒

飲訖樂止贊衆官俯伏興贊各官就座執事者進各官卓樂作有花則散花樂止色長跪啓承應畢進第二爵酒色長跪啓二奏永南山之曲各官立斟酒畢復坐執事者隨斟各官酒色長跪唱進酒飲畢樂止進湯鼓吹響節前導至殿外大樂作各官起立進畢復坐執事者即供各官湯色長跪唱進湯樂作食畢樂止色長跪啓承應畢進第三爵酒色長跪啓三奏桂枝香之曲進酒進湯如前儀飲畢色長跪啓承應畢進第四爵酒色長

跪啓四奏初春曉之曲進酒進湯如前儀色長跪啓承應畢進第五爵酒色長跪啓五奏乾坤泰之曲進酒進湯如前儀色長跪啓承應畢進第六爵酒色長跪啓六奏昌運頌之曲進酒進湯如前儀色長跪啓承應畢進第七爵酒色長跪啓七奏泰道開之曲進酒進湯如前儀畢收爵進湯及大膳如前儀進畢收膳色長跪啓承應畢贊徹案自下而上贊起文武官如前列班樂作四拜樂止分東西序立典儀跪啓禮畢樂作引王還宮樂

止各官以次出常宴五爵禮儀同凡遇正旦聖節王壽

日設宴用花其餘常宴不用

來朝

明祖訓

凡親王每歲朝覲不許一時同至務要一王來朝還國無虞信報別王方許來朝諸王不拘歲月自長至幼以嫡先至嫡者朝畢方及庶者亦分長幼而至週而復始母得失序

凡諸王居邊者無警則依朝來朝有警則從便不拘朝期

凡天子與親王雖有長幼之分在朝廷必講君臣之禮
蓋天子之位即祖宗之位宜以祖宗所執大圭於上鑄
字題曰奉天法祖世世相傳凡遇親王來朝雖長於天
子者天子執相傳之圭以受禮蓋見此圭如見祖考也
凡諸王來朝祭祀辨與未辨先常服見天子三叩頭不
拜奉天殿見畢不拘何殿樓閣門下天子執大圭王具

冕服叙君臣禮行五拜三叩頭見畢諸王係尊長天子
係姪孫引王至何便殿王坐東面西天子衣常服叙家
人禮行四拜不叩頭王坐受然雖行家人禮君臣之分
不可不謹天子居正中南面坐以待尊長次見東宮行
四拜禮如王係尊長東宮答拜

凡親王係天子伯叔之類年踰五十則不朝世子代之
孫姪之輩年踰六十則不朝世子代之

凡親王來朝若遇大宴會諸王不入筵宴中若欲筵宴

於便殿去處精潔茶飯叙家人禮以待之羣臣大會宴中王並不入席所以慎防也

凡親王每歲來朝自備飲膳其隨從官員軍士盤費馬疋草料俱各自備毋得干預有司恐惹事端

事例

凡王世子既授封其叔父行禮班次遇節令行公禮依宗子法重在世子家庭私會依家人禮尊歸叔伯

凡親王來朝預先具奏有旨免來則寫書報王

樂

事例

洪武初定凡王國廟樂生三十六人鐘磬各一瑟二
琴八墳箎簫笛各二笙四柷敔各一搏拊二歌工八舞
生七十二文舞三十六人各執羽籥武舞如文舞之數
各執干戚中各以二人為引舞 又定王府樂工例設
二十七戶於各王境內撥與供用 十五年定王國樂
工樂器冠服之制凡朝賀用大樂樂工二十七人樂器

用戲竹二頭管四笛四杖鼓十二大鼓一花梨木拍板
一冠服用紅絹綵畫胸背方花小袖單袍有花鼓吹冠
錦臂韁皂靴抹額用紅羅彩畫束腰用紅絹宴禮七奏
樂樂工八人樂器用紫竹簫二紫竹笙二篋二花梨木
拍板一冠服同前迎膳大樂樂工八人樂器用戲竹二
杖鼓二小鼓一花梨木拍板一冠服亦同前其餘樂工
冠服用綠絹彩畫胸背方花小袖單袍無花鼓吹冠抹
額以紅絹彩畫束腰以紅絹

婚姻

明祖訓

凡親王妃宮人等必須選擇良家子女以禮聘娶不拘處所勿受大臣進送恐有奸計但是娼妓不許狎近

事例

天順間定凡宗室有請繼室者無後者方許 弘治間定凡王府擇婚務要會同長史承奉教授等官於本境內揀選家道清白人物俊秀年長成者就行彼處按察

司覈勘明白方許其奏並不許倫理失序於例有違
凡王府前妃有出聽王自備財禮於本境民間女內選
娶一人以為內助不授繼妃之封

凡王府選婚若先通媒合納賄營求及扶同保勘婚配
不當者經該官吏媒合人等通坐以枉法罪名營求撥
置之人問發邊衛充軍

凡各處郡王除正妃外妾媵多不過四人鎮國輔國將
軍除正夫人奉國將軍除正淑人外妾媵各不過三人

鎮國中尉除恭人輔國中尉除宜人奉國中尉除安人
外妾媵各不過二人生子之日先期開具姓名奏報以
後請名請封庶無僭差若是濫收過數將輔導隱匿不
奏官員叅提究問奏請降調邊方

凡各王府選擇儀賓須年十五以上人物長成俊秀者
方許具奏成婚

凡王府選中儀賓俱送本處儒學讀書習禮教官嚴加
訓迪務俾講學修德既婚之後仍在本學讀書

凡宗室降為庶人者天順間奏准其子女婚嫁有司每
人辦與四表裏首飾銀二十兩猪四口羊四隻自令婚
配

奏事

明祖訓

凡親王及嗣或出遠方或守其國或在京城朝廷凡有
宣召或差儀賓或駙馬或內官齋持御寶文書并金符
前去方許起程詣闈

凡王遣使至朝廷不須經由各衙門直詣御前敢有阻當者即是奸臣其王使至午門直門軍官火者大逮捕聞若不奏聞即係奸臣同黨

事例

正統九年令各郡王奏事以所奏事理先令長史司啓親王知參詳可否然後出批付令奏聞惟機密事不在此例 弘治十三年申定各郡王并將軍中尉凡有奏請先令長史司具啓親王知會參詳可否若應該具奏

者然後給批差人齎奏如違該衙門將齎奏人員并教
授一體叅究其所奏事件仍行長史司具啓親王查勘
叅詳明白具奏方纔施行若機密重事或與親王事有
干涉及郡王分封相離寫遠不在一城居住者許令徑
自具奏本府將軍以下俱啓王代奏若事與親王無干
及不係機密重情無故驕越具奏者所司備查前例上
請區處若已經叅詳奏行勘問未結重復奏擾即將奏
詞立案不行

凡王府發放一應事務所司隨即奏聞必待欽准方許
奉行若不奏聞及已奏不待回報擅自承行者一體治
以重罪在京各王出府之日法司即查前例通行長史
司知會遵守

明會典卷五十四

欽定四庫全書

明會典卷五十五

禮部十四

蕃國禮

蕃王來朝

洪武二年定凡蕃王來朝至龍江驛驛官具報應天府
府報中書省及禮部禮部以聞遣侍儀通贊舍人二員
接伴遣應天府知府至驛禮待前期館人於正廳陳設

蕃王座于廳之西北東向知府座于東南西向知府至館以賓王接見具酒食宴待畢知府還蕃王送出於門外次日清晨從官復伴送蕃王入會同館禮部尚書奉旨即館中宴勞尚書至蕃王服其國服出迎相見宴享于龍江驛酒行作樂宴畢尚書及從官送至蕃王與其從官送至館門外明日中書省奏知命官一員詣館如前宴勞禮部告示侍儀司以蕃王及其從官具服于天界寺習儀三日擇日朝見前一日內使監陳設御座香

案于奉天殿尚寶司設寶戶于御座前侍儀司設蕃王
與其從官次于午門外蕃王拜位于丹墀中道稍西及
御座之南其從官拜位于蕃王丹墀拜位之後俱北向
設方物案于丹墀之北中道東西方物狀案于御座前
及丹墀中受方物官位于方物案之東西知班二人位
于蕃王拜位之北引蕃王舍人二人位于蕃王之北引
蕃王從官舍人二人位于蕃王從官之北俱東西相向
餘如朝會儀是日鼓初嚴禮部陳方物于午門外舉案

者就案次嚴執事官俱入就位接伴舍人引班舍人引
蕃王及其從官立俟于午門外三嚴文武官具朝服入
就侍立位執事舉方物案蕃王等從其後由西門入奉
天西門至殿前丹墀西俟立侍御奉迎皇帝具禮服御
輿以出大樂鼓吹振作陞座樂止捲簾鳴鞭報時訖蕃
王及其從官各就拜位執事者以方物案置蕃王拜前
贊拜樂作蕃王及其從官皆四拜樂止引班導蕃王升
殿宣方物官取方物狀從行俱由西升樂作從殿西門

入內贊接引蕃王至御前樂止贊拜蕃王再拜跪稱茲
遇某節欽詣皇帝陛下稱賀致詞訖宣方物官跪于御
前西宣狀承制官跪承制詣蕃王前立宣制訖贊拜蕃
王俯伏興再拜蕃王及宣方物狀官俱由西門出樂作
復位樂止贊拜樂作蕃王及其從官皆四拜樂止禮畢
鳴鞭皇帝興樂作至謹身殿樂止引班導蕃王及其從
官俱出見皇太子前一日禮部官以蕃王所獻東宮方
物咨知內使監設皇太子位于東宮正南蕃王及其從

官次于東門外又設蕃王拜位于殿門外及殿外其從官拜位于殿下中道之東西俱北向引班二人于蕃王拜位之北引從官二人于從官拜位之北皆東西相向餘陳設如朝會儀質明蕃王朝見皇帝訖常服至東宮門外文武官公服入侍從皇太子皮弁服出樂作陞座樂止引班引蕃王入樂作至位樂止其從官俟立于殿下東西相向贊拜作樂蕃王再拜皇太子立受引班蕃王至殿西門贊接引至殿中跪稱茲遇某節詣皇太子

殿下稱賀致詞訖俯伏興蕃王復位贊拜樂作再拜皇
太子答拜樂止蕃王出皇太子坐引班引蕃王從官及
拜位贊拜樂作從官皆四拜樂止禮畢皇太子興樂作
入殿門樂止蕃王及其從官以次出接伴舍人引見親
王前期王府官設王座于正殿東稍西北向蕃王座于
稍南東向蕃王拜位于座之南王答拜位于座之北蕃
王從官拜位于殿外門北向內贊二人位于殿上之東
西承傳二人位于殿門外之東西接伴舍人位于內贊

之南東西相向引從官二人位于拜位之北王府官侍立位於殿上左右俱東西相向是日所司陳儀仗於殿之東西蕃王至王府門外執事者先入就位王皮弁服出陞座蕃王至殿下由西階升王降座出迎于殿門外既見王府官引王由中門入舍人引蕃王由西門入各就拜贊拜蕃王再拜王答拜就座蕃王從官就拜位皆四拜禮畢蕃王詣王座前王降座蕃王舉手揖畢王還府蕃王出王府官送至門外擇日錫宴于謹身殿拱衛

司設黃麾仗于殿廷左右內使擎執如奉天殿受朝賀儀內使監陳設御座于殿中皇太子座于御座東偏稍南諸王座皆以次而南俱西向入設諸王座于西偏與東偏諸王座相對俱東向蕃王座于殿中之西第一行東向次設文武一品陪宴座第二行二品三品三行俱東西相向蕃王從官文武三品陪宴官俱以序座于西廡東向北上和氣郎陳大樂細樂舞隊于殿之南楹光祿寺設御尊于殿中之南皇太子諸王蕃王至二品官

酒尊于殿門左右之東西御位司壺二人尚酒尚食二人東偏皇太子諸王司壺一人奉酒食二人西偏諸王如之蕃王司壺一人奉酒食二人文武官第一行及左右第二行各司壺四人兼供酒食光祿寺直長于西廡各置尊酒及司壺供酒食之人光祿寺卿陳御食案及皇太子諸王食案寺丞設蕃王食案于殿中直長設殿上左右文武官及西廡食案各于其座前諸執事者各供事舍人引文武官常服侍立于殿門之左右又引蕃

王服其國服侍立于百官之北引進引皇太子諸王常
服侍立殿內之左右侍儀導引皇帝常服陞御座大樂
鼓吹振作鳴鞭樂止皇太子諸王各就座禮部官取旨
導蕃王入就座光祿寺少卿舉御食案進于御前禮部郎
郎光祿寺少卿舉食案置于皇太子諸王之前禮部郎
中光祿寺丞舉食案置于蕃王前文武官及蕃王從官
各以次就座內使監令于御前斟酒司壺于皇太子諸
王以下各斟酒細樂作奏太清之曲和聲郎北面立舉

手唱上酒皇帝舉爵飲皇太子以下皆飲畢樂止酒再行細樂作奏感皇恩之曲樂作內使監令于御前進食供食者自皇太子以下各供食大樂作和聲郎唱上食皇帝進食皇太子以下皆食畢樂止進食奏大樂食畢樂止進食奏大樂食畢樂止凡五進食皆如之酒四行細樂作奏普天同樂之曲飲畢樂止進食酒五行細樂作舞諸國來朝之舞飲畢樂舞止進食酒六行細樂作奏朝天子之曲飲畢樂止進食酒七行細樂作奏醉太

平之曲舞長生隊之舞飲畢樂舞止進食其西廡斟酒
進食之次亦如殿中惟不用樂宴畢皇帝興樂作皇太
子諸王還宮樂止蕃王文武官俱以次出東宮擇日宴
蕃王是日宿衛陳設如朝會儀中書省大都督府御史
臺宴樂蕃王陞辭其陳設行禮如朝見儀惟不設宿衛
及傳制方物案宣狀等官辭東宮亦如見儀惟不跪致
辭禮畢中書省率禮部官送至龍江驛禮部設宴如初
至禮部官還應天府官送起行

二十七年更定蕃王來朝儀

見朝儀項下

蕃使朝貢

洪武二年定使者至龍江驛遣應天府同知禮侍如蕃
王朝貢禮明日同知與蕃使至會同館接伴舍人引蕃
使由西同知由東入報中書省省臣以聞命禮部侍郎
於館中禮侍如前儀宴畢蕃使送侍郎出蕃使還館侍
儀司以蕃使于天界寺習儀三日擇日朝見前一日內
使監御御座香案于奉天殿尚寶卿設寶案于御座前

侍儀司設表案于丹墀中道之北及殿上正中方物案于丹墀表案之南舉案執事位各於位左右使者拜位于中道方物案之南通使位於使者之西俱北向餘陳設如朝會儀是日鼓初嚴百官具公服侍儀舍人入陳設次嚴執事者以方物各置于案弁之前行舍人引使者服朝服奉表後從由午門西門入至殿前丹墀西東向俟立三嚴文武官入就侍立位皇帝服皮弁服出樂作陞座樂止鳴鞭報時訖執事者置方物案退立於左

右舍人引使者置表于案就拜位贊拜樂作使者及衆使皆四拜樂止舍人引使者詣表案跪取表授受表官又取方物狀授受方物狀官受表等官俱由西階升至殿廷以表置于案贊宣表官取表跪宣于殿西宣訖興置表于案退立殿西宣方物狀官亦如之俱由殿西門復位使者皆俯伏興復位承制官承制自中門出降詣使者前稱有制使者皆跪宣制曰皇帝問使者來時國王安否使者答畢俯伏興樂作再拜樂止承制官稱有

有後制使者皆跪宣制曰皇帝又問爾使者遠來勤勞
使者答畢俯伏興樂作再拜樂止承制官升殿中跪復
命訖復侍立位樂作使者皆四拜樂止禮部収表及方
物禮畢皇帝興樂作還宮樂止文武官及使者皆出蕃
使見東宮畢禮部奉旨錫宴於會同館前期館人設坐
次於館中御酒案于正中禮部主客命執事設酒案食
案于廳之南楹教坊司設樂是日禮部官陳龍亭于午
門外光祿寺官奉旨取御酒置于龍亭儀仗鼓樂前導

至館蕃使出迎于門外執事者奉酒及奉旨官由中道入使者由西階升立于廳之西隅執事者置酒于案奉旨官立于案東稱有制使者望闕跪聽宣畢贊拜使者再拜奉旨官酌酒授使者俱北面跪飲畢使者又再拜各就座執事者進食案酒七行作細樂湯五品作大樂酒五行七行陳雜戲宴畢奉旨官出使者送至館門外擇日皇太子錫宴次中書宴于左司次都督府御史臺俱宴於經歷司並如前禮蕃王從官儀使者還陞辭陳

設如朝見儀如有賜物禮部官于午門外置于案執事者服窄服紅衫舉案捧禮物官具朝服入陳案于丹陛東南賜詔則設詔書案於禮物案之北拱衛司用黃蓋遮覆使者行禮部官捧禮物及詔書自丹陛中道出至午門外付使者行初蕃使陞辭畢則辭東宮亦如初見儀出至午門外禮部官率應天府官送至龍江驛設宴如初

十八年更定凡蕃國初附遣使奉表進貢方物先於會

同館安歇禮部以表副本奏知儀禮司引蕃使習儀擇日朝見其日錦衣衛陳設儀仗和聲郎陳大樂于丹陛如常儀儀禮司設表案於奉天殿東門外丹陛上方物案於丹陛中道之左右設文武百官侍立位于文武樓南東西相向蕃使服其服捧表及方物狀至丹墀跪授禮部官受之詣丹墀置于案執事者各陳方物于案畢典儀內贊外贊宣表展表官宣方物狀官各具朝服其餘文武官常服就位儀禮司官奏請陞殿皇帝常服出

樂作陞座樂止鳴鞭訖文武官入班叩頭禮畢分東西
侍立引禮引蕃使就丹墀拜位贊四拜典儀唱進表序
班舉表案由東門入至於殿中內贊贊宣表外贊令蕃
使跪宣表宣方物狀訖蕃使俯伏興四拜禮畢駕興樂
作還宮樂止百官及蕃使以次出其蕃國常朝及為國
事謝恩遣使進表貢方物皆如前儀唯不宣表

聖節正旦冬至蕃國望闕慶祝儀

洪武二年定前期執事者于王宮正殿南向陳香燭案

於闕廷前王拜位于殿中禡位于香案前衆官拜位于
王之後俱北向司禮司贊于王拜位之北司香二人于
香案前俱東西相向是日陳軍仗于王宮門之外樂工
陳樂於拜位之後衆官先具朝服引班于王宮門外東
西執事俱就位王於後殿具冕服未賜者服其服衆官
入俟立於殿庭東西王出樂作由西陞升至拜位樂止
衆官就拜位贊拜樂作王興衆官皆四拜樂止王由東
門入樂作至禡位樂止贊跪王與衆官皆跪王三上香

俯伏興衆官皆興王由東門出樂作還位樂止贊拜樂作王與衆官皆四拜樂止贊搢笏三舞蹈跪三拱手加額呼萬歲出笏俯伏興贊四拜禮畢王與衆官以次出

蕃國遣使進表儀

洪武二年定前期所司于王宮內外及國內街巷結彩設闕亭於殿上正中表箋案于闕庭前香案于表箋案前司香二人于香案左右王拜位于殿中衆官位王後俱北向司禮二人于王位北引禮二人於王位左右引

班四人于衆官左右俱東西相向使者立位于香案東
捧表箋二人於香案西設樂于衆官拜位之後龍亭于
殿南正中儀仗鼓樂于龍亭前是日清晨司印者陳印
案於殿中滌印訖以表箋及印俱置于案王具冕服衆
官具朝服詣案前用印畢用黃袱裹表紅袱裹箋各置
于匣中仍各以袱裹之捧表箋官捧置于案使者與捧
表箋官各就位引王引王及衆官俱入就拜位贊拜樂
作再拜樂止王詣香案前跪衆官皆跪王三上香訖捧

表官取表東向跪進王受表以進于使者使者西向跪受興置于案贊興王復位贊拜樂作王與衆官皆四拜樂止禮畢捧表箋官捧表前行置於龍亭中金鼓儀吹鼓樂前導王送至宮門外還衆官朝服送至國外使者乃行

蕃國迎詔儀

洪武十八年定使者入蕃國境先遣人馳報於王王遣官遠接詔前期令有司於國門外公館設幄結彩設龍

亭於正中設香案于龍亭之南備金鼓儀仗鼓樂伺候迎引又于國城內街巷結綵王宮內設闕亭於殿上正中設香案于闕廷之前設司香二人於香案之左右設詔使立位于香案之東設開讀案于殿陛之東北設蕃王拜位于中道北向設蕃國衆官拜位于蕃王拜位之南異立重行北向設宣讀官位于開讀案之北展詔官二人于宣讀官之南俱西司司禮二人位于蕃王拜位之北東西相向引禮二人位於司禮之南東西相向引

班四人于衆官拜位之北東西相向陳儀仗于殿廷之東西設樂位于衆官拜位之南北向遠接官接見詔書迎至館中安詔于龍亭中遣人馳報王王即率國人衆官及耆儒道出迎于國門外至館中具冕服衆官具朝服行五拜禮訖迎詔出館至國門金鼓在前次僧道耆儒次衆官次衆次儀仗鼓樂次詔書龍亭使者常服行于龍亭後迎至殿中金鼓分列門外之左右置龍亭于殿上正中使者立於東引禮引王入就拜位引班引

衆官人等各就拜位司贊唱開讀詔展詔授捧詔官對
展宣詔官稱有制贊跪蕃王及衆官跪宣讀畢捧詔官
捧詔至龍亭前授使者仍置于龍亭中贊俯伏興平身
樂作贊鞠躬樂作四拜樂止唱搢圭鞠躬三舞蹈跪唱
山呼百官拱手加額曰萬萬歲凡呼萬歲樂工軍校擊
鼓齊聲應之唱出笏俯伏興樂作四拜興平身樂止禮
畢引禮引蕃王退引班引衆官以次退蕃王及衆官釋
服使者以詔書付所司頒行蕃王與使者分賓主行禮

--	--	--	--	--	--	--	--

明會典卷五十五

欽定四庫全書

明會典卷五十六

禮部十五

官員拜禮

禮儀定式

凡公侯駙馬相見各行兩拜禮一品官見公侯駙馬一
品官居右行兩拜禮公侯駙馬居左答禮二品見一品
二品居右行兩拜禮一品居左答禮三品見二品三品

居右行兩拜禮二品居左答禮四品見三品四品居右行兩拜禮三品居左答拜五品見四品五品居右行兩拜禮四品居左答禮六品以下倣此如三品見一品四品見二品行兩拜禮一品二品官答受從宜餘品倣此如有親戚尊卑之分從行私禮

事例

洪武四年令凡官員奏事聽宣詔進物受賜及祭祀上香奠帛祭酒讀祝等事行跪禮如常儀凡揖禮下見上

躬身舉手齊眼為敬上官隨坐隨立無答其次下官舉手齊口上官舉手齊心答之 二十九年令凡王府將軍與駙馬儀賓公侯相見將軍居左駙馬等居右皆再拜與文武一品至三品官相見將軍居中各官拜將軍答禮與四品以下官相見各官拜將軍坐受 三十年令凡百官以品秩高下分尊卑其品級近者相見行禮則東西對立稍卑者居西高者居東其品級相越二三等者卑者居下尊者居上其相越四等者則卑者拜下

尊者坐而受禮有事則跪白如一品與二品相見二品居西行禮一品官居東答禮與三品四品相見三品四品居下行禮一品居中答禮與五品以下相見一品坐受稟事則跪餘倣此凡司屬官品級亞於上司官者稟事則跪凡近侍官員難拘品級行跪拜禮亦不許與外官交接凡同僚官品級有高下者不拘凡大小官員于內府相見不許跪拜 弘治十二年議准王府長史不許行走三司中門若相見之際須以禮待之 十五年奏

准陝西行太僕寺卿與御史相見比遼東山西等處例

出入行走中門正道

官員公座

禮儀定式

凡大小衙門官員每日公座行肅揖禮佐貳官揖長官
長官答禮首領官揖長官佐貳官長官佐貳官拱手

屬官見上司官

禮儀定式

凡屬官見上司官必序立于堂階之上總行一揖上官拱手首領官答揖其公幹節序見上司官皆行兩拜禮長官拱手首領官答禮

事例

洪武五年令凡內外掾史令史書吏宣使奏差人等晨謁長官必序立階下一揖乃退長官不答禮幕官拱手如節序及公參或差遣辭見俱兩拜長官不答禮凡吏典見幕官亦序立階下肅揖幕官不答禮如時節公參

或差遣辭見俱兩拜長官不答禮凡吏典見幕官亦序立階下肅揖幕官不答禮如時節公參差遣辭見行兩拜禮幕官拱手十五年令所屬卑官參見者不答品級等者答拜所屬官品級高者與上司官卑者均禮

公聚序坐

禮儀定式

凡文武官公聚各依品級序坐若資品相同者各照銜門次第若王府官屬與朝官坐立各照品級俱在朝官

之次

事例

洪武二十四年令凡學官位于雜職之上 二十五年
令王府筵宴按察司僉事入殿坐于長史之上 宣德
三年令御史給事中照品級坐 景泰三年令六科都
左右給事中內外序坐書銜俱居御史之左 成化二
年奏准凡鎮守總兵巡撫等官列坐總兵係伯爵以上
者居左巡撫係僉都御史以上者居右若總督提督軍

務等官自僉都御史以上俱坐於總兵官侯伯之左列
名于前 五年奏准在京法司會官審囚俱于承天門
外東西重行列位公侯駙馬伯列于東班都督等官列
于東班後行尚書都御史侍郎等官列于西班通政司
大理寺佐貳官并六科掌科給事中列于西班牙後行禮
部會議民情俱于闕左門東直房序坐尚書左右都御
史等官上坐侍郎副都御史等官對坐通政司參議大
理寺寺丞等官列于東傍六科掌科都給事中列於西

傍南京文武衙門公事會集序坐亦如之 八年奏准
御史郎中員外郎主事奉勅同差者俱照新差職名先
後序坐若郎中等官奉勅會同御史或御史奉勅會同
郎中等官行事當以奉勅之人坐左次者居右其各衙
門一應公差有關會御史者俱讓御史居左若不係同
差別處政務相關止依品級序坐 十四年定在外總
兵巡撫官位次左右都督與左右都御史並都督同知
與副都御史並都督僉事與僉都御史並俱文東武西

伯以上則坐於左 十五年奏准都御史係總督及提督軍務者不分左右副僉俱坐於左總兵官俱坐於右

官員相遇迴避等第

禮儀定式

凡駙馬遇公侯分路而行一品二品遇公侯駙馬引馬側立須其過二品見一品二品趨右讓道而行三品遇公侯駙馬引馬迴避遇一品引馬側立遇二品趨右讓道而行四品遇一品以上官引馬迴避遇二品引馬側

立遇三品趨右讓道而行五品遇二品以上官引馬迴避遇三品引馬側立遇四品趨左讓道而行六品遇三品以上官引馬迴避遇四品引馬側立遇五品趨右讓道而行七品遇四品以上官引馬迴避遇五品引馬側立遇六品趨右讓道而行八品遇五品以上官引馬迴避遇六品引馬側立遇七品趨右讓道而行九品遇六品以上官引馬迴避遇七品引馬側立遇八品趨右讓道而行品級相等者分路而行如有親戚尊卑之分聽

從迴避 凡內官遇駙馬於道必須下馬遇公侯一品
二品官引馬側立遇三品四品官分路而行 凡公侯
駙馬一品二品隨從火者人等非跟隨本官而私自出
入者凡遇文武百官必須下馬違者治罪 凡所屬官
遇上司官引馬迴避所屬官品級高者遇上司官卑者
分路而行 凡官員應合迴避而路窄不可迴避者則
下馬拱立應分路者不得占中道 凡文武官員出入
應合開道而自不開道致令應迴避官員不曾迴避者

不問若因而生事者止問上官 凡街市軍民人等買賣及乘坐驢馬出入者遙見公侯駙馬一品以下至四等官過往即便下馬讓道 凡官員當避路者若承宣召及祠祭官請祠所并有捕逐者在道雖遇應避之官不避

事例

洪武二十九年令凡遇王府將軍于道駙馬儀賓公侯讓左文武一品至三品官引馬側立四品以下官下馬

三十年令凡軍民人等於街市遇見官員引道經過
即須下馬却避不許衝突違者論罪

官員儀從

禮儀定式

凡文武百官自四品以上儀從並依舊制從宜五品官
止許引導一人六品以下不許引導其出郊在外儀從
仍依舊制不拘此例

事例

洪武二十四年更定官員儀從公十人侯八人伯六人
一品至三品六人四品至六品四人七品至九品二人
其役使奴婢公侯之家不過二十人一品不過十二人
二品不過十人三品不過八人 成化元年令凡京官
出外四品以上引導三對用錫梨鋼義藤棍七品以上
引導二對用錫梨藤棍在外方面堂上官引導三對用
錫梨鋼義藤棍各府及鹽運司等衙門四品以上官引
導二對用錫梨藤棍七品以上引導一對用藤棍八品

九品用竹箠一對引導雜職不許引導若府州縣官催徵用竹箠荆杖巡捕用义刀之類導引者不在禁限其京官回還鄉里本府州縣並不許引導及責罰吏民違者從巡按御史按察司官究治若風憲官僭用亦許諸司指實具奏

新官到任儀

事例

洪武十八年定一有司新官受職赴任者未到城一舍

二三十里而止先令人報知禮房吏告示官屬及父老人等相率出城來會令灑掃合祀神祇祠宇備牲醴祭儀以俟謁告比至城外齋宿三日第四日清晨父老人等導引入城遍詣諸神祠如儀致祭其祝文曰維某年月日某官某人奉命來官務專人事主典神祭今者謁神特與神誓神率幽冥陰陽表裏予有政事未備希神默助使我政興務舉以安黎民予倘怠政奸貪陷害僚屬凌虐下民神其降殃謹以牲醴致祭神其鑒之尚享

一祭神之禮新官到任之日詣神廟祭祀禮房先備牲酒等物陳設禮生父老人等導引新官同僚屬官吏請廟贊禮唱排班班齊鞠躬拜興拜興平身贊唱行初獻禮引贊引新官詣神位前贊唱跪新官跪贊唱衆官皆跪贊唱獻爵執事捧爵于左跪新官獻畢仍授執爵者以爵奠於神位前贊唱讀祝執事者取祝跪讀畢贊唱俯伏興平身贊唱行亞獻禮執事以爵酌酒奠於神位前終獻如亞獻儀畢贊唱鞠躬拜興拜興平身禮畢一

新官到任之日本衙門合備儀仗皂隸前期一日出城伺候至日清晨首領官率禮房吏迎接入城先詣神廟祭祀畢引至本衙門儀門外下馬從中道入先於月臺上望闕設香案禮生引新官至香案前行五拜三叩頭禮畢上廳公座皂隸排衙報時辰摺書案至前吏房將公座呈押一參見禮先從皂隸次吏典各行兩拜禮新官坐受次合屬官參見亦行兩拜禮新官拱手答禮次首領官見行兩拜禮新官起身拱手答禮次佐貳官行

兩拜禮新官出公座答禮如是佐貳官到任先受所屬
首領官行禮至長官前行兩拜禮長官出公座答禮畢
諭僚屬曰朝廷設官置吏欲其敬神恤民親賢遠奸興
利除害某不敏忝茲重任尚賴一二僚屬及邑中長者
匡其不逮庶免後艱其四境之內利有當興弊有當革
某等當共竭力為之以安黎庶諭畢署押公文各房吏
典將該管應有已未完結事件施行等項逐一開寫須
知呈報新官署押文書如係長官則交割印信倉庫匙

鑰等件畢照依各房報呈須知事目逐一發落署判公
事畢將所祭牲酒與官屬父老享飲而退其九年考滿
仍具牲酒率官屬父老人等辭廟致祭就以祭物出郊
餞別而去其祝文及所諭之言禮生代說亦可 宣德
十年奏准各布政司按察司府州縣新官到任于本處
城隍廟會請應祀諸神用猪羊二牲總祀

庶人常見禮儀

諸司職掌

凡民間子孫弟姪甥婿見尊長生徒見師範奴婢見家長久別行四拜禮尋常近別行揖禮其餘親戚長幼照依等次久別行兩拜禮尋常近別行揖禮平交同

事例

洪武五年令凡鄉黨叙齒民間士農工商人等平居相見及歲時宴會揖拜之禮幼者先施坐次之列長者居上如佃戶見佃主不論齒序並行以少事長之禮若親屬不拘主佃止行親屬禮十二年令內外官致仕居

鄉惟于宗族序尊卑如家人禮于其外祖及妻家亦序
尊卑若筵宴則設別席不許坐于無官者之下如與同
致仕官會則序爵爵同序齒其與異姓無官者相見不
須答禮庶民則以官禮謁見敢有凌侮者論如律

明會典卷五十六

欽定四庫全書

明會典卷五十七

禮部十六

冠服

袞冕

諸司職掌

袞冕十二章

冕版廣一尺二寸長二尺四寸冠上有覆元表朱裏前

後各有十二旒旒五采玉珠十二玉簪導朱纓圭長一尺二寸

元衣纁裳衣六章織日月星辰山龍華蟲裳六章織宗彝藻火粉米黼黻

中單以素紗為之

紅羅蔽膝上廣一尺下廣二尺長三尺織火龍山三章革帶佩玉長三尺三寸

大帶素表朱裏兩邊用緣上以朱錦下以綠錦

大綬六采用黃白赤元縹緑織成純質五百首小綬三
色同大綬間執三玉環

朱襪赤舄祭天地宗廟及正旦冬至聖節則服之

明集禮

祭社稷先農冊拜皆服袞冕

皮弁服

諸司所掌

皮弁服其皮弁用烏紗冒之前後各十二縫每縫中綴

五采玉十二以為飾玉簪導紅組纓其服絳紗衣蔽膝
隨衣色白玉佩革帶玉鈞牒緋白大帶白襪黑舄

明集禮

朔望視朝降詔降香進表四夷朝貢朝覲則服皮弁

常服

明集禮

常服烏紗折角向上巾盤領窄袖袍束帶間用金玉琥

珀透犀

皇后冠服

禮服

明集禮

冠為圓匡冒以翡翠上飾以九龍四鳳大花十二樹小花如大花之數兩博鬢十二鈿服襍衣深青為質畫翟赤質五色十二等素紗中單黼領朱羅縠襍襷蔽膝隨衣色以緞為領緣用翟為章三等大帶隨衣色朱裏紺其外上以朱錦下以綠錦紐約用青組玉革帶青襪青

卷之十一
鳥以金飾凡受冊謁廟朝會皆服之

常服

明集禮

雙鳳翊龍冠首飾釧鍔金玉珠寶翡翠隨用諸色團衫
金繡龍帶用金玉燕居則服之

事例

洪武四年定常服龍鳳珠翠冠真紅大袖衣霞帔紅羅
長裙紅褙子別制如特髻上加龍鳳飾衣用織金龍鳳

文加繡飾

皇妃冠服 内命婦附

禮服

明集禮

冠飾以九翬四鳳花釵九樹小花如大花之數兩博鬢
九鉢翟衣青質編次於衣及裳重為九等青紗中單黼
領朱縠襍禊裾蔽膝隨裳色加文繡重雉為章二等以
緞為領緣大帶隨衣色玉革帶青襪鴟佩綬凡受冊助

祭朝會則服之

常服

明集禮

鸞鳳冠首飾釧鐸用金玉珠寶翠諸色團衫金繡鸞鳳
不用黃帶用金玉犀燕居則服之

事例

洪武四年定常服山松特髻假鬢花鉢或花釵鳳冠真
紅大袖衣霞帔紅羅裙羅褶子衣用織金及繡鳳文東

宮妃王妃同 五年定內命婦三品以上用花釵翟衣
四品五品用山松特髻大衫為禮服貴人視三品以后
妃燕居冠及大衫霞帔為禮服珠翠慶雲冠鞠衣褙子
緣禊禊裙為常服

東宮冠服

袞冕

諸司職掌

袞冕九章

冕九旒旒九玉金簪導紅組纓兩玉瑱

圭長九寸五分

元衣纁裳衣五章織山龍華蟲宗彝火裳四章織藻粉

米黼黻

白紗中單黼領

蔽膝隨裳色織火山二章

革帶金鈎解玉佩

綬五采用赤白元縹綠織成純赤質三百三十首小綬

三色同大綬間織三玉環

大帶白表朱裏上緣以紅下緣以綠

白襪赤舄陪祀天地宗廟及正旦冬至朝賀則服之

明集禮

從祭社稷及受冊納妃皆服袞冕

皮弁服

皮弁用烏紗冒之前後各九縫每縫中綴五采玉九金簪朱纓玉圭絳紗袍紅裳素白中單蔽膝隨裳色玉佩

大帶大綬襪烏

明集禮

朔望朝降詔降香進表四夷朝貢朝覲則服皮弁

常服

事例

洪武元年定常服烏紗折上巾

東宮妃冠服

禮服

明集禮

犀冠刻以花鳳首飾釧鍔用金玉珠寶翠諸色團領衫
金繡鸞鳳惟不用黃帶用金玉犀燕居則服之

親王冠服

袞冕

諸司職掌

袞冕九章

冕五采玉珠九旒紅組纓青纊充耳金簪道子

主長九寸二分五釐

青衣纁裳衣五章織山龍華蟲火宗彝裳四章織藻粉

米黼黻

白紗中單黼領青緣

蔽膝隨裳色織火山二章

革帶金鈎解佩玉

綬五采赤白元縹綠織成純赤質三百二十首小綬三

色同大綬間織三玉環

大帶表裏白羅朱緣綠

白襪朱履助祭謁廟正旦冬至等朝賀則服之

明集禮

受冊納妃皆服袞冕

皮弁服

皮弁用烏紗冒之前後各九縫中綴五采玉九金簪朱
纓玉圭絳紗袍紅裳素紗中單蔽膝隨裳色玉佩大帶

大綬襪舄

明集禮

朔望朝降詔降香進表四夷朝貢朝覲則服皮弁

親王妃冠服公主同

禮服

明集禮

冠飾以九翬四鳳花釵九樹小花如大花之數兩博鬢
九鈿翟衣青質五色九等繡翟編次於衣及裳素紗中
單黼領朱縠襍禊裾蔽膝隨裳色以緞為領緣繡翟為

章二等大帶隨衣色玉革帶青襪舄佩綬凡受冊助祭朝會則服之

常服

明集禮

犀冠刻以花鳳首飾釧鍔用金玉珠寶翠諸色團領衫
金繡花鳳惟不用黃帶用金玉犀燕居則服之

世子冠服

袞冕

諸司職掌

袞冕七章

冕三采玉珠七旒紅組纓青纊充耳金簪導

主長九寸

青衣纁裳衣三章織華蟲火宗彝裳四章織藻粉米黼黻

素紗中單青領襍赤黻

革帶佩白玉玄組綬

綬紫質用紫黃赤三采織成間織三白玉環白襪赤舄

事例

洪武二十二年定凡遇聖節千秋節並正旦冬至進賀表箋及其父王生日諸節慶賀皆服袞冕

皮弁服

皮弁烏紗冒之前後各八縫每縫中綴三采玉八金簪朱纓玉圭絳紗袍紅裳素紗中單蔽膝隨裳色玉佩大

帶大綬襪舄

世子妃冠服

珠翠七翟冠大衫霞帔用大紅金繡雲鳳文金翟頭褙
子鞠衣金繡雲鳳文大帶用青羅或用紅玉穀圭玉革
帶玉綬花玉佩青羅襪青紵絲描金雲鳳鳥上加珠六
顆

郡王冠服

充冕

袞冕五章

冕三采玉珠七旒紅組纓青纊充耳金簪導

圭長九寸

青衣纁裳衣三章織宗彝藻粉米裳二章用黼黻
素紗中單青領襯裾玉佩綬間織二玉環襪舄

皮弁服

皮弁用烏紗冒之前後各七縫每縫中綴三采玉七金
簪朱纓玉圭紅裳素紗中單蔽膝隨裳色玉佩大帶大

綬襪舄

郡王妃冠服 郡主同

珠翠七翟冠大衫霞帔用大紅金繡雲翟文金墜頭褙
子鞠衣金繡雲翟文大帶用青羅或用描金雲翟鳥上
加珠六顆

長子冠服

朝服

七梁冠大紅素羅衣白素紗中單大紅素羅裳及蔽膝
大紅素羅白素紗二色夾帶玉朝帶丹磬紅花錦錦雞

綬玉佩象牙笏白絹襪皂皮雲頭履鞋

公服

皂皴紗幞頭大紅素綺絲衣玉革帶

常服

烏紗帽大紅綺絲織金獅子開襟圓領玉束帶皂皮銅線靴

長子夫人冠服

珠翠五翟冠大紅綺絲衫深青綺絲金繡翟雞稍子青

羅金繡翟雞霞帔金墜頭

鎮國將軍冠服

與長子同

鎮國將軍夫人冠服

與長子夫人同

輔國將軍冠服

與鎮國將軍同惟冠六梁帶用犀

輔國將軍夫人冠服

與鎮國將軍夫人同惟冠用四翟抹金銀墜頭

奉國將軍冠服

與輔國將軍同惟冠五梁帶用金釦花常服大紅織金虎豹

奉國將軍淑人冠服

與輔國將軍夫人同惟褙子霞帔金繡孔雀文

鎮國中尉冠服

與奉國將軍同惟冠四梁帶用素金佩用孽玉

鎮國中尉恭人冠服

與奉國將軍淑人同

輔國中尉冠服

與鎮國中尉同惟冠三梁帶用銀釦花綬用盤鵠公服

用深青素羅常服紅織金熊羆

輔國中尉宜人冠服

與鎮國中尉恭人同惟冠用三翟褙子霞帔金繡鴛鴦

文銀墜頭

奉國中尉冠服

與輔國中尉同惟冠二梁帶用素銀綬用練鵲幞頭黑
漆常服紅織金彪

奉國中尉安人冠服

與輔國中尉宜人同惟大衫用丹磬紅褙子霞帔金繡

練鵲文

縣主冠服

珠翠五翟冠大紅紵絲大衫深青紵絲金繡孔雀褙子

青羅金繡孔雀霞帔抹金銀墜頭

郡君冠服

與縣主同惟冠用四翟褙子霞帔金繡鴛鴦文

縣君冠服

與郡君同惟冠用三翟

鄉君冠服

與縣君同惟大衫用丹碧紅褙子霞帔金繡練鵲文

明會典卷五十七